

FEDERALNO MINISTARSTVO POLJOPRIVREDE, VODOPRIVREDE I ŠUMARSTVA

Na osnovu člana 12. stav 1. Zakona o veterinarstvu ("Službene novine Federacije BiH", broj 46/00), federalni ministar poljoprivrede, vodoprivrede i šumarstva donosi

**UPUTSTVO O PROVOĐENJU MJERA ZA OTKLANJANJE I SPRJEČAVANJE
ZARAZNIH I PARAZITSKIH BOLESTI ŽIVOTINJA ZA 2014. GODINU**

I

Ovim Uputstvom se propisuju obaveze vlasnika životinja da provedu mjere propisane godišnjom Naredbom o mjerama kontrole zaraznih i parazitskih bolesti životinja i njihovom provođenju u 2014. godini ("Službeni glasnik BiH", broj 31/14) (u daljem tekstu: Naredba).

Troškove provođenja obaveznih mjera kontrole zaraznih i parazitskih bolesti u 2014. godini snose vlasnici životinja ako za tu namjenu nisu osigurana sredstva u budžetima kantona, te ukoliko to ovim Uputstvom nije drugačije definisano.

Ukoliko vlasnik životinja odbije provođenje jedne ili više propisanih mjera za životinjske vrste koje posjeduje, veterinarska organizacija dužna je o tome pismenim putem informisati nadležnu veterinarsku inspekciju i Federalno ministarstvo poljoprivrede, vodoprivrede i šumarstva (u daljem tekstu: Ministarstvo).

Također, Uputstvom se propisuju procedure provođenja mjera propisanih Naredbom, a koje se finansiraju iz sredstava Programa utroška sredstava sa kriterijima raspodjele "Poticaj za veterinarstvo" utvrđenim Budžetom Federacije BiH za 2014. godinu Ministarstvu (u daljem tekstu: Program).

II

1. Tuberkuloza goveda

Jednom godišnje kod svih goveda starijih od šest sedmica koja se u trenutku implementacije mjere nalaze na gazdinstvu, mora biti provedena opća tuberkulinizacija u skladu sa Naredbom.

Ukoliko se na gazdinstvu drže i druge prijemčive životinjske vrste iste je neophodno ispitati na tuberkulozu.

Sa ciljem utvrđivanja službeno slobodnog statusa stada od tuberkuloze iz Programa će se finansirati dvokratna tuberkulinizacija mliječnih goveda starijih od 12 mjeseci na gazdinstvima sa četiri i više goveda u razmaku ne kraćem od 6 i ne dužem od 12 mjeseci.

Tuberkulinizacija mliječnih goveda provodi se koristeći bovini tuberkulin u skladu sa uputstvom proizvođača.

Veterinarske organizacije dužne su same osigurati potrebne količine toberkulina.

Veterinarska organizacija provodi mjere samo na području epizootološke jedinice (općine) na kojoj je registrovana.

Prilikom posjete gazdinstvu sa četiri i više mliječnih goveda, veterinar je dužan objasniti vlasniku koje su to mjere dijagnostičkog ispitivanja koje je potrebno provesti na njegovom gazdinstvu u skladu sa vrstama životinja koje posjeduje i u skladu sa Naredbom, te ponuditi vlasniku da potpiše Izjavu iz priloga 3. ovog Uputstva.

Ukoliko vlasnik odbije potpisati Izjavu, vlasnik snosi sve troškove dijagnostičkog ispitivanja u skladu sa Naredbom i ovom Uputstvom.

Vlasniku životinja koji potpiše Izjavu, veterinar će provesti sva dijagnostička ispitivanja u skladu sa Naredbom na način da će se troškovi dvokratnog dijagnostičkog ispitivanja na brucelozu i tuberkulozu mliječnih goveda starijih od 12 mjeseci finansirati iz Programa dok će ostale dijagnostičke mjere vlasnik sam finansirati.

Veterinarske organizacije će prilikom dostavljanja izvještaja Ministarstvu o provedenim mjerama dijagnostičkog ispitivanja na brucelozu i tuberkulozu potpisati Ugovor sa Ministarstvom kojim će se obavezati da će istu mjeru ponoviti na istom gazdinstvu u periodu ne dužem od 12 i ne kraćem od 6 mjeseci.

Ministarstvo će veterinarskoj organizaciji nakon potpisivanja Ugovora uplatiti sredstva za već provedeno dijagnostičko uzorkovanje kao i za ono koje će veterinarska organizacija provesti u periodu ne dužem od 12 i ne kraćem od 6 mjeseci.

Veterinarska organizacija dužna je vlasniku životinja nakon provedenih mjera izdati Potvrdu o provedenim obaveznim mjerama u skladu sa privitkom V. iz Naredbe, koja se izdaje umjesto tzv. mliječnog kartona.

U sklopu provođenja mjera dijagnostičkog ispitivanja, veterinarske organizacije će na gazdinstvima sa četiri i više životinja provesti popis životinja koristeći Obrazac iz priloga 2. ovog Uputstva.

Veterinarske organizacije dužne su sačiniti detaljan plan implementacije tuberkulinizacije sa tačno određenim datumom kontrole tuberkulinizacije, imenom, prezimenom i adresom vlasnika životinje, te isti dostaviti kantonalnoj veterinarskoj inspekciji koja će u skladu svojim mogućnostima i procjeni rizika provesti kontrolu implementacije tuberkulinizacije.

Cijena usluge veterinarske organizacije za jednokratno provedenu mjeru tuberkulinizacije koja se finansira iz Programa iznosi 15 KM (u cijenu je uračunat PDV).

2. Bruceloza goveda

Kod svih goveda starijih od 12 mjeseci koja se u tom trenutku nalaze na gazdinstvu, te svih novonabavljenih goveda, prije uvođenja u uzgoj, potrebno je provesti uzorkovanje krvi i pretražiti na brucelozu goveda u skladu sa Naredbom.

Sa ciljem utvrđivanja službeno slobodnog statusa stada od bruceloze iz Programa će se finansirati dvokratno uzorkovanje krvi i laboratorijska dijagnostika mliječnih goveda starijih od 12 mjeseci na gazdinstvima sa četiri i više goveda u razmaku ne kraćem od 6 i ne dužem od 12 mjeseci.

Cijena jednokratnog uzimanja uzoraka krvi goveda, koje se finansira iz Programa, za veterinarske organizacije iznosi 6 KM (u cijenu uračunat PDV), a za laboratorijsku pretragu dostavljenih uzoraka krvi 6 KM (u cijenu uračunat PDV).

U slučaju pojave bruceloze ljudi potrebno je provesti dijagnostičko ispitivanje svih prijemčivih životinja na gazdinstvu, a troškovi uzorkovanja i dijagnostičkog ispitivanja finansirati će se iz Programa.

3. Enzotska leukoza goveda

Zbog nefunkcionisanja jedinstvenog sistema za obilježavanje goveda, nemogućnosti efikasnog kontrolisanja kretanja životinja i neusklađenosti broja životinja za pojedino gazdinstvo u bazi podataka i realnog broja goveda na gazdinstvu ukida se status službeno slobodnog stada od enzotske leukoze za cijelu Federaciju Bosne i Hercegovine (u daljem tekstu: Federacija BiH).

U skladu sa uslovima propisanim Naredbom sva goveda starija od 24 mjeseci moraju biti pretražena na enzotsku leukozu goveda.

4. Goveđa spongioformna encefalopatija

Na goveđu spongioformnu encefalopatiju moraju biti pretražena sva goveda u skladu sa uslovima propisanim Naredbom.

Laboratorijska dijagnostika uzoraka mozga goveda koja su prije uginuća pokazivale poremećaj nervnog sistema, u 2014. godini finansirati će se iz Programa.

Cijena usluge uzimanja uzoraka mozga uginulih goveda nepoznate etiologije za laboratorijsku dijagnostiku na goveđu spongioformnu encefalopatiju od strane veterinarske organizacije iznosi 50 KM (u cijenu je uračunat PDV), a cijena laboratorijske dijagnostike iznosi 45 KM (u cijenu je uračunat PDV).

Krajnji rok za provođenje mjere i dostavu izvještaja je kraj tekuće godine.

5. Antraks

Prije puštanja na ispašu, sva goveda u antraksnim distriktima i poplavama pogođenim područjima moraju se vakcinisati protiv antraksa.

6. Ostale bolesti

Za sve ostale bolesti životinja i mjere propisane Naredbom čija implementacija nije zasebno obrađena u ovom Uputstvu, važe uslovi propisani Naredbom.

III

Mjere tuberkulinizacije i uzimanje uzoraka krvi za dijagnostiku bruceloze, a koje se finansiraju iz Programa, provodit će se istovremeno.

Sve veterinarske organizacije koje provode mjere tuberkulinizacije i dijagnostičkog uzorkovanja krvi goveda na brucelozu, a koje se finansiraju iz Programa, dužne su Ministarstvu dostaviti izvještaj o provedenoj mjeri, koje treba da sadrži:

- zahtjev za isplatu sredstava,
- kopiju Izjave potpisane od strane vlasnika i veterinara iz veterinarske organizacije (prilog 3.),
- Obrazac o popisu goveda na gazdinstvu (prilog 2.),
- ručno ne terenu popunjenu Evidencijsku tabelu uz obavezan svojeručni potpis vlasnika (tabela iz priloga 1.),
- Evidencijsku tabelu u elektronskoj formi (Excel),
- fiskalni račun,
- popratni akt o slanju uzoraka na laboratorijsku dijagnostiku na brucelozu i
- laboratorijski nalaz.

Krajnji rok za dostavljanje izvještaja Ministarstvu o provedenoj tuberkulinizaciji i uzorkovanju krvi goveda za veterinarske organizacije je 30. septembar 2014. godine.

Ukoliko se pregledom dostavljenog izvještaja veterinarske organizacije utvrdi da nije dostavila propisanu dokumentaciju ili nije u cijelosti popunila i dostavila sve podatke propisane u: Izjavi, Obrascu i Evidencijskoj tabeli, ako životinja na kojoj je provedena mjera nije propisno obilježena ili se ista ne nalazi u jedinstvenoj bazi podataka odnosno ako su podaci o životinji pogrešni za te životinje neće biti isplaćena sredstva za obavljanje uslugu.

”Službene novine FBiH”, broj: 55/14

Veterinarske ustanove koje će provoditi laboratorijsko ispitivanje dostavljenih uzoraka na brucelozu su: Veterinarski fakultet u Sarajevu - Centar za kontrolu zdravlja životinja, JU Veterinarski zavod Tuzlanskog kantona i JU Veterinarski zavod Bihać.

Veterinarske ustanove dužne su Ministarstvu dostaviti izvještaj o provedenom dijagnostičkom ispitivanju koje treba da sadrži:

- zahtjev za isplatu sredstava;
- laboratorijske nalaze
- kopije popratnih akata veterinarskih organizacija i
- fiskalni račun.

IV

Sva goveda ovce, koze i svinje na teritoriji Federacije BiH moraju biti obilježeni u skladu sa uslovima propisanim Pravilnikom o obilježavanju i kontroli kretanja životinja u Bosni i Hercegovini ("Službeni glasnik BiH", br. 13/10, 79/10, 25/11 i 103/11). Do potpunog ustrojstva jedinstvene baze podataka o obilježenim životinjama na nivou Bosne i Hercegovine, za goveda će se primjenjivati odredbe Pravilnika o označavanju životinja i shemi kontrole kretanja životinja u Bosni i Hercegovini ("Službeni glasnik BiH", broj 28/03), a za ovce, koze i svinje odredbe Pravilnika o obaveznom obilježavanju i upisu u jedinstveni registar ovaca, koza i svinja te vođenju evidencije ("Službene novine Federacije BiH", broj 87/07).

Ukoliko se prilikom provođenja mjera utvrde znakovi karakteristični za neku od bolesti propisanih Naredbom, potrebno je bez odlaganja provesti sve mjere za tu bolest u skladu sa relevantnim propisima na snazi kojima je regulisana navedena bolest.

Veterinarske organizacije za koje se utvrdi da se u svom radu ne pridržavaju uslova propisanih ovim Uputstvom i svim drugim zakonskim i podzakonskim aktima propisanim za pojedinu bolest isključit će se iz implementacije svih mjera otkrivanja, sprječavanja širenja i iskorjenjivanja zaraznih i parazitarne bolesti životinja koje se finansiraju iz Budžeta Federacije BiH.

U prilogu IV. Naredbe propisana je tabela "Mjesečni izvještaj o provođenju mjera" koju vode i redovno ažuriraju sve veterinarske organizacije u Federaciji BiH i jedanput mjesečno u pisanoj ili elektronskoj formi dostavljaju Ministarstvu i nadležnom kantonalnom ministarstvu za poslove iz oblasti veterinarstva.

U prilogu V. Naredbe propisana je Potvrda o provedenim obaveznim mjerama, koju vlasniku izdaje veterinarska organizacija nakon provođenja propisanih mjera u skladu sa Naredbom i koja zamjenjuje tzv. mliječni karton.

U prilogu 1. ovog Uputstva nalazi se Tabela 1. Evidencijska tabela - koju na terenu popunjavaju veterinarske organizacije u sklopu provođenja mjera tuberkulizacije goveda, a svojeručno je potpisuje vlasnik životinje kao potvrdu daje mjera provedena. Popunjene Evidencijske tabele veterinarske organizacije prepisuju u elektronsku formu Excel tabele i dostavljaju Ministarstvu u sklopu izvještaja o provedenoj mjeri tuberkulizacije koja se finansira iz Programa.

U prilogu 2. ovog Uputstva propisan je Obrazac za popis goveda na gazdinstvu kojeg popunjavaju veterinarske organizacije i dostavljaju Ministarstvu u sklopu izvještaja o provedenoj mjeri tuberkulizacije koja se finansira iz Programa.

U prilogu 3. ovog Uputstva propisana je Izjava koju potpisuje vlasnik životinja i veterinar, a čiju kopiju dostavljaju veterinarske organizacije u sklopu izvještaja o provedenoj mjeri tuberkulizacije koja se finansira iz Programa.

Veterinarska organizacija dužna je čitko i u cijelosti popuniti sve podatke koji se zahtijevaju u Evidencijskoj tabeli, Izjavi i Obrascu za popis goveda na gazdinstvu.

V

Veterinarske organizacije će na području Federacije BiH provesti popis svih goveda i gazdinstava na kojima se životinje nalaze.

Naknada za popis gazdinstava sa tri i manje goveda kao i gazdinstava na kojima se drže tova goveda iznosi 3,5 KM po gazdinstvu (u cijenu uračunat PDV).

Veterinarske organizacije provoditi će mjere propisane ovim Uputstvom i Naredbom samo na području epizootičke jedinice (općine) na kojoj su za tu djelatnost registrovane.

Troškove obilježavanja životinja, što podrazumijeva stavljanje usne markice i izdavanje svih za tu svrhu potrebnih dokumenata, snosi vlasnik životinje, a cijena zavisno o vrsti životinje iznosi:

1. goveda 5 KM
2. ovce i koze 1 KM
3. svinje 1 KM

VI

Ovo Uputstvo stupa na snagu narednog dana od dana objave u "Službenim novinama Federacije BiH".

Broj 06-24/18-1890-1/14
01. jula 2014. godine
Sarajevo

Ministar
Jerko Ivanković -
Lijanović, s. r.